



# Tir Yimiyim



Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tiryimiyim@aolima



tir yimiyim

TAPAK 7

**Swiatek nem WTA Player of the Year naroküm agütsüogo**

**Chuba tilutsüba atema Thai MP ka tepuokdaki yok**

VOL. XXI NO. 67 (ADOK 67) DIMAPUR YANGTEPNÜ (THURSDAY) LUCHII (DECEMBER) 14, 2023 ₹ 5.00

## Parliament nung mokozü amshia meingprongertem apu

New Delhi, December 13, 2023

**(Agencies):** Bodbarnü Parliament nung security inyakyim ajangdanga mapa inyakba nung shilem agir nisung 6 puogo.

Tanü anüngdang Sagar Sharma aser D Manoranjan nati Lok Sabha taktang telung nung yellow smoke canisters pokdaksü aser külen Parliament kima nung Neelam Devi aser Amol Shinde nati red & yellow canisters pokdaksü.

Iba tatalokba dak sendakba nung tai tongloksür nisung pungububaji Lalit Jha lir. Nisung pungu ya Gurgaon nung par kidang anenzük.

Maneni nisung trokbubaji Vicky Sharma lir aser pa-a Gurgaon nung alir.

Lok Sabha nung smoke cans amshir nisung ana ya ka Uttar Pradesh kübok Lucknow aser ka Karnataka kübok Mysuru nungi lir ta jangjaogo.

Ano, Parliament kima nung apurtem ya ka Maharashtra kübok Latur aser ka Haryana kübok Hisar nungi lir.

Sagar Sharma aser Manoranjan na ya Lok Sabha nung aliba visitors' gallery nung mena liasü aser BJP MP Pratap Sinha'er office-i mepishiba agi tena nem entrance passes agütsü.

Parnok nisung trok ya küm pezü tejakdang nungi metetepa aküm aser parnoki iba sentong ya külemi atong. Parnoki Parliament complex jungjunga asadanga liasü.

Parnok ajaki Parliament telungi tunüa liasü saka Sagar Sharma o Manoranjan nati dang

pass angu. Delhi Police-i Sagar Sharma aser D Manoranjan na indang Aadhaar cards dena osang kar metetdaksüogo. Angazükba agi Neelam Devi (42) ya tesayur ka aser lai civil services atema renemer.

2020 küm Centre sorkari Farm Law asem yangluba anema aluyimertemi lungkak aйдang lai shilem agia liasü saka la ya political party kecha dena sendaktepa mali ta Neelam tedii ashi.

Küm 22 tejakdang kasa anogo nung kiralongrartemi Parliament ki tejenba amak aser idangji sepai 8 tashi khaseta liasü.

Khalistani kiralongrar Gurpatwant Singh Pannun-i Parliament tamendakdak anokshitsüsa amaksü ta amokmerenba sülen iba lendong atalokogo.

Bodbarnü Lok Sabha nung Zero Hour session alidang Sagar Sharma-i visitors' gallery nungi chamber telungi pungoka ait. Pai yellow smoke canister ka lapok aser Lok Sabha Speaker menden tonga aotsü merang.

Ajisüaka pa MP temi apu aser karibo pa dak azük. Iba mapang Manoranjan-bo visitors' gallery nung dang liasü aser paia smoke canister ka lapok.

Parliament telung nung iba ya atalokba sülen mapang tatsüka dang lir kima nung Neelam Devi aser Amol Shinde nati yellow aser red smoke canisters pokdaksü aser yimiyimtem ayim.

Delhi Police nung Anti-Terror cell-i parnok ajak dang asüngdangya südar.

## NBOCWBB documentary videos sayaogo

Kohima, December 13, 2023

**(TYO):** December 13, 2023 nü Nagaland Building and Other Construction Workers' Welfare Board (NBOCWBB) documentary videos sayaogo.

Iba sentong ya Conference Hall, Information & Public Relations nung ayongzüka agi. "IPR Department aser NBOCWBB ajanga tangalen nungi aayangi arurtem ajungkettsü meranga inyakba atema tenüngsang agütsür" ta IPR Director Dzüvinuo-i ashi.

Laisa kaketzülurtem dang lokti dak sendakba tebilemtsütem lemsatepsü atema ayongzüük.

Iba sentong nung Director Dzüvinuo-i "Building dreams: Journey of Naga Construction Workers" aser "All in a Day's Work" documentary tem sayatsü.

Mezüngbuba documentary ya Riverrocks Films nungi Kivini

Shohe aser tanabuba ya Takeone Production House nungi Sesino Yhoshu nati direct asü.

Deputy Labour Commissioner & NBOCWBB CEO T. Chubayanger-i NBOCWBB tenzüka osang lemsatepba den aayangertem nem social security agütsütsü asoshi mapa balala inyakba osang metetdaksü.

Asenoki tangalen nungi aayangi arurtem ya local nisungtemi melentsüla ta Chubayanger-isa ashi.

Paisa Eastern Nagaland nung takok anguba osang kar lemsatep aser mapa manguba khuret ajema akümtsü atema local workers adoktsü ayongzüük.

NBOCWBB-i Department of Information & Public Relations den yaritepa video te m yanglu aser official DIPR YouTube channel nung angutsü.

## Police-i drug free Nagaland akümtsü meranger: DGP Sharma



Kohima, December 13, 2023

**(TYO):** India sorkari 'drug free nation' ka akümtsü merangba ama Nagaland Police-ia drug free Nagaland akümtsü meranger ta DGP Rupin Sharma-i ashi.

Iba atema Nagaland Police-i inyakyim aika tenzüko. Police-i public den tongteprateper, awareness campaigns agir, inter-department amalitepa inyaksangshir, prosecution & technology tajungba akümtsü meranger aser Canine Squad lapokogo ta DGP Rupin-i ashi.

NDPS ken o tem atema technology amshiba aser interstate coordination ajanga nisungtem apur ta paisa ashi.

Police Headquarters-i Narcotic cell tenzüka dang masü saka district units nem teyari agütsür. Bushisüngdangtsü aser maparen inyaksü atema nübo shimshio ago aser iba mapa maneni dang inyaka arudar, ta Rupin-isa ashi.

Nagaland state police-i lanur, bendanga agütsüba police tem bushir aser iba maparen inyaksü jangraba ketdangsurtem pelashishia dang agizüktsü ta paisa metetdaksü.

## Chhattisgarh aser Madhya Pradesh nung BJP sorkartem tenteter

New Delhi, December 13, 2023

**(Agencies):** Prime Minister Narendra Modi aser BJP lennir tejentem lia Vishnu Deo Sai-i Chhattisgarh Chief Minister inyaksü tezüngzüktep agiogo.

Kasa mapang Arun Sao aser Vijay Sharma nati Deputy Chief Minister inyaksü tezüngzüktep agia liasü.

Madhya Pradesh, Chhattisgarh aser Rajasthan nung BJP-i Chief Minister aser Deputy Chief Minister inyaksü nübo tasentem dang shimogo.

Vishnu Deo Sai-i Lok Sabha nung Raigarh constituency nungi kümsük pezüben (1999 nungi 2014) atongtepa MP inyakogo.

NDPS dak sendakba ken o tem asoshi specialised training aser skill upgradation agütsütsü. NDPS dak sendakba ken o tem atema DIG jenjang nung ketdangsur ka link officer ama shimogo, ta DGP Rupin-isa ashi.

**Nisung 456 apu; Rs 190 crore jenjang drugs apu**

January 1, 2023 nungi tang tashi nung Nagaland Police-i ken o 318 benok aser nisung 456 puogo ta DGP Rupin Sharma-i ashi.

Iba mapang tsüngda police-i Rs 1.90 crore tema jenjang apu: Ganja-1171.5 Kgs, Opium-32.645 Kgs, Heroin-26.631 Kgs, Brown Sugar- 5.465 Kgs, Yaba Tablets- 21027 nos, Spasmoproxyvon Capsules-34186 Nos, Nitrozepam tablets - 2344 Nos, Nitrosen- 1550 Tabs, Alprazolam Tablets- 4010 nos. Crystal Meth- 460 Grams, Simplex Capsules- 22182 Nos. Sampex Plus Capsules= 11018 Nos. Cough Syrup- 6139 Bottles.

Nagaland police-i NDPS indang supply chain raksatsütsü atema temulung agütsür. Iba atema inyakyim aika tenzüko

asur network nung inyaker ajak aputsü meranger.

Zubza Police Kohima nung ken o benokba atema bushisüngdanga aruba sülen nisung 12 puogo. Iba ken o atema November 13 nü mezüngbuba nisung apu.

Iba ajanga Nagaland, Manipur, Assam, Arunachal Pradesh, Punjab aser ano tanga state tem nung NDPS shibelenba maparen ka putetogo.

Tang police-i pua alirtem ya Nagaland, Manipur aser Assam nungi lir aser ano nisung aikati shilem agia alitsü ta bilema bushisüngdang südar ta DGP Rupin-i ashi.

Nagaland Police-i civil society organisations aniochtsü merangogo aser community policing atema lenmang lapoktsüogo ta paisa ashi.

Angami Youth Organisation aser Angami Students' Union-i Nagaland Police yaritsü nangzüko, ta Rupin-isa shisem.

DGP Rupin Sharma-isa public dang drugs shibelenertem apuba maparen nung yariteptsü mepishia metetdaksü.

Minister tem-Devendra Fadnavis o Ajit Pawar aser Uttar Pradesh Chief Minister Yogi Adityanath nungertem aden.

Madhya Pradesh nungsa Mohan Yadav den külemi Rajendra Shukla aser Jagdish Devda nati deputy Chief Minister ama inyaksü.

Mongulbarnü BJP-i Rajasthan nung chief minister inyaksü atema tang mezüng atema MLA inyaker Bhajanlal Sharma shima nisungtem aoksadaksüogo.

Rajasthan nung deputy CM ana alitsü aser tenaji Diya Kumari aser Prem Chand Bairwa na lir. Rajasthan atema BJP central observer Rajnath Singh-i ashi.

# Sangtamtilla Arogo nung tetsütem school agi



Sangtamtilla Ao Baptist Arogo nung Durrano Mother School nung tesayurtem den sentong nung adener tetsütem noksa nung angur.

**Dimapur, December 13 (TYO) :** Sangtamtilla Ao Baptist Arogo, Dimapur nung tetsütem asoshi taoba ita November 27 nungi 29 tashi 'Durrano Mother School' sentong ka ayongzüka agiogo. Iba sentong ya Dimapur Ao

Baptist Arogo (DABA)-i nübo aser rongsen den tesayurtem yoka katsüba sentong ka liasü. Iba sentong nung Wt.Moala (Aonokpu), Wt. Renemla (Mongsenyimti), Wr.Achila (Khensa) aser

Wb.Sanenba (changtongya) nungertemi tongti shilem agia liasü. Iba ama tanü kibongtem nung nungdakba tesayuba aser teyari agütsüba atema DABA dang kanga pelar ta Sangtamtilla Ao Baptist Arogoi metetdaksüogo.

# DMHSS tesayurtem nem training agütsü



**Dimapur, Luchii/December 13 (TYO):** Dimapur Mission Higher Secondary School nung tesayurtem asoshi anogo ka training sentong School Governing Board ajanga December 12, 2023 nü ayongzüka liasü.

Sashi Wapang IRS ajanga "Nudging young Minds to a brighter future" omen nung ajemdaker jembi. Iba session nung shisalen sayuri tongtipang yimya tenet nung ajemdaker lanurtem anitetsü indang ashi. Dangar den jembishinüba yimya, pei ajungtsü mechi jangratema aliba nungi pilaba aser tamakok agizükba, financial literacy aser awareness, sobaliba aser tera wazüka ayuba, jenjang balala nungi nüburtem den lirumedema aliba, asen ket nung aliba resources tajungtiba asoshi amshiba indang pai

jembi aser ajakji yutsür Tsüngrem tiyong südaksütsüla ta ashi. Session tanabuba ya Vanhunglo Murry-i "Developing Emotional Intelligence for a positive student - Teacher Relationship" onük nung ajemdaker agia liasü. Shisalen sayuri educator ka ama aibelen mesüi jembishinütsü, züngok-züngoka angatsü, dangar mulung angatetba aser dangar asoshi nükrangdong ka ama alitsü ashi aser kaketshir aser tesayur tsüngta tesendaktep tajung yangertsü ayongzüka liasü.

Iba training nung shisalen sayur ya Sashi Wapang, IRS, Additional Commissioner GST, Dimapur Branch aser Vanhunglo Murry, Leadership and personality Development coach, Unity College, Dimapur and professional Life coach liasü.

Mezüngbuba session nung



Tuli Town Hall nung December 13, 2023 nü Vishit Bharat Sankalp Yatra Tuli (Urban) sentong agia liasü, kong tesemdanger tongti ama Shaying Sheu ADC Tulu dena liasü. Iba sentong ya Nukshimatong SDO (C) Tuli lenisüba nung agi aser sentong nung adener ajungai Sankalp (Pledge) agia liasü.

# Christmas tenüng nung DDCF office shibanger

**Dimapur, Luchii/December 13 (TYO):** Christmas sodi ama December 13, 2023 nungi January 17, 2024 tashi DDCF office shibangtsü, ta Dimapur District Citizens' Forum ajanga sangdong ka nung metetdaksü. DDCF ajanga nübur ajunga dangi benjong salem abener aser Dimapur yimti nung Yisu Khrista asoba benjong temeim, bendanga agütsüba, tai atokba,

tepela aser lemsatepba tanüla nung amungtsü imlar, ta sangdong ajanga ashi. Nüburtem ajunga dang kanga kumdanga benjong amungtsü aser pei mulungjang nung Christmas tanüla lidaktsütsü ayongzüka liasü. DDCF ajanga ajak dangi tepela Christmas aser tesunep New Year 2024 salem abener, ta sangdong ajanga ashi.

# Tuensang DPDB senden nung telemtetba balala agi

**Dimapur, Luchii/December 13 (TYO):** Tuensang District Planning and Development Board (DPDB) ita shia amenba senden den külemi Khristmas yongya sentong ka December 13, 2023 nü Noksen Sub-Division kübok Thangki nung agia liasü.

takok ngua inyaka aoba nung yaritsü asoshi lir. Board ajanga Noksen Town nung aliba Sub Town Council upgrade asütsü benokba ama SDO (C) Noksen dangi yok. Noksen Town nung Agriculture aser Land Resources office amenoktsü asoshi tim department dangi proposal yoka liasü. Region nung aluyimba maparen tajungba kumdaktsütsü mechi Longra village nung aliba Mokden Farm nung power inoktsütsü asoshi Board-i recommendation agüja liasü aser Lithem aser Longkong yimtsüngtem sendakteptsü asoshi iron suspension bridge ka yanglutsü (NEP) 2020 tajungtiba nung

Iba sentong ya DPDB Tuensang indang Chairman aser MLA Imtichuba lenisüba nung agia liasü.

Iba senden nung Sao Chang College, Tuensang yanglushitsü asoshi Board-i recommendation agütsü, kechiaser campus nung Scinece lab ka densema ki o jen yanglutsü nungdakba ajiteta liasü. Ibai talisa college nung National Education Policy (NEP) 2020 tajungtiba nung

recommend asü. Region nung aluyimba maparen tajungba kumdaktsütsü mechi Longra village nung aliba Mokden Farm nung power inoktsütsü asoshi Board-i recommendation agüja liasü aser Lithem aser Longkong yimtsüngtem sendakteptsü asoshi iron suspension bridge ka yanglutsü (NEP) 2020 tajungtiba nung

# MCTS ajanga Ongjinaro Festival ayongzüksü



**Dimapur, Luchii/December 13 (TYO):** Mopungchuket Community Tourism Society (MCTS) ajanga December 14 & 15, 2023 anogotem Süngkotenem Park, Mopungchuket nung mezüngbuba Ongjinaro Festival ayongzüksü.

lungjemer maparen balala inyaktsü nükjidong lir. Ongjinaro ya akumbok nung tajungba ainer aser iba naro ya anepalutsü kanga tasak masü. Anogo ana Ongjinaro benjongmung nung shilem ka ama benjong nung adeni arurtemi arem nung aliba Ongjinaro reprangtetsü. Iba benjong nungya chiyongtsü ayokba stall tem lapoka Ao Naga nunger chiyongtsütem, fast food, mapok chi, chiyongtsü takong, naro tajem aser takok, handloom, jewellery, handicraft, kentemenu amala angutsü.

Mopungchuket tourism temaba jenjangi ajungkettsü aser yimtsüng nung anguba 'Ongjinaro' (Sarcandra glabra) ya temaba jenjangi ajungketa cash crop kumdaktsütsü nükjidong nung iba benjong ya ayongzüker.

Ajidang masü tila-tanurtem asaydak tesem balaka lapoktsü aser Ao Naga nungeri akhi mapang nungi süa aruba ki angutsü.

Ongjinaro ya Mopungchuket nung angur aser küm aika Christmas ki naro inokba nung amshia arur aser nüburtemi 'local holly' ta ajar.

Ajidang masü tila-tanurtem asaydak tesem balaka lapoktsü aser Ao Naga nungeri akhi mapang nungi süa aruba ki angutsü.

Mopungchuket yimtak alirtemi küm shia Christmas mapang iba naro/süngdong ya Mokokchung nung dang masü saka Kohima, Dimapur aser tesem balala nung ayoker.

December 15 nikongdang 5:00 ako nungi tenzüka kentemenu aser DJ session alitsü.

Ongjinaro ya commercial crop ka ama kumdaktsütsü asoshi MCTS yagu sorkar meyong ahencies mesüra jangra aliba lokti tentet balala den

Iba Ongjinaro Festival ya December 14, 2023 anepdang 10:30 ako nungi tenzüksü aser iba benjong ya Mokokchung Chamber of Commerce and Industry (MCCI) tir Tsukti Longkumer-i moatsütsü.

### Parliament nung security raksa; police-i nisung pongu puogo



December 13, 2023 nü New Delhi nung Lok Sabha senden tagidak mapang nung mejangjaba nisung ana telungi aiter pongdang ka nungi mokozü chiokba sülen tangokba noksa nung angur. 2001 küm kiralongrartemi Parliament amakba anogomong nung ya atalok.

**New Delhi, Luchii/December 13 (Agencies):** Bodhbarnü Lok Sabha nung senden tagidak mapang mejangjaba nisung ana Lok Sabha sabangleni oa mokozü chiok.

2011 küm kiralongrartemi Parliament amakba mapang nung nisung 14 asüba sülen küm 22 ajungba anogomong nung Bodhbarnü ya atalokogo.

Lok Sabha nung senden tagidak mapang nisung ka Lok Sabha senden telung jagi asema aiter, iba sülen pongdang ka nungi mokozü chioker. Iba tatalokba sülen Parliament House anaprongla nung senden thina liasü.

Iba tatalokba dak sendakba nung tang tashi nung Delhi Police-i nisung pongu puogo. Nisung ana Parliament telung nung apu aser nisung ana kima apu. Parliament kima longkak aiter tetsür ka densema nisung ana apu.

Iba tatalokba sülen tesemdangertem, taoba mapang MP tem aser MP tem indang Personal Assistant ajak Paliament telungi aitsü melaba nokdangogo.

Lok Sabha telungi air anaji ka Lucknow nungi Sagar Sharma aser ka Mysuru nungi Manoranjan D na lir ta jangjaogo. Kima longkak aiter

anaji ka Haryana kübok Hisar nungi Neelam (tetsür) aser ka Maharashtra nungi Amol Shinde lir, ta jangjaogo.

Security raksaba dak sendakba nung Rajya Sabha nung opposition MP temi Union Home Minister Amit Shah dang nungi telangzüba meshir. Opposition-isa Parliament Building tasenba nung security raksaba ya ruling BJP tai ajanga lir, ta aitsüogo.

Osang angazükba agi, iba tatalokba dak sendakba nungi nisung ponguji tanga state tem nungi aruba sülen Gurugram nung aliba ki ka nung monga liasü.

### Vishnu-i Chhattisgarh CM aser Mohan Yadav-i MP CM tenangzükba agi

**New Delhi, December 13 (Agencies):** Bodhbarnü taoba mapang Union Minister, Vishnu Deo Sai-i Chhattisgarh Chief Minister tenangzükba agiogo; iba sentong nung Ato kilonser Narendra Modi densema party nung tongti lenirtem aika aden.

Arun Sao aser Vijay Sharma natia Deputy Chief Ministers tenangzükba agi.

Tang mezüng BJP-i Madhya Pradesh, Chhattisgarh aser Rajasthan state tem nung Chief Minister aser Deputy Chief Ministers menden atema tasenpurtem dang shima liasü.

Vishnu Deo Sai mezüng 1990 küm village sarpanch inyaka yimtenren nung ajemoka liasü. Iba sülen 1999 küm nungi

2014 küm tashi pa Raigarh constituency nungi Lok Sabha MP kümsük pezüben inyakogo. 2019 Lok Sabha election nungbo pai metoktepi liasü.

Bodhbarnep Madhya Pradesh nunga Mohan Yadav-i Chief Minister tenangzükba agiogo. Iba sentong nung Ato kilonser Minister Narendra Modi, Union Home Minister Amit Shah aser BJP National Tir JP Nadda nung densema party nung tongti lenirtem aika aden.

Tenangzükba agiba sentong nungjisa Gujarat Chief Minister Bhupendra Patel, Uttarakhand Chief Minister Pushkar Singh Dhami, Maharashtra Chief Minister Eknath Shinde, Deputy Chief Ministers- Devendra

Fadnavis den Ajit Pawar aser Uttar Pradesh Chief Minister Yogi Adityanath nung aden.

Madhya Pradesh nunga Rajendra Shukla aser Jagdish Devda nati Deputy Chief Ministers tenangzükba agi aser taoba mapang Union Minister Narendra Singh Tomar-i Assembly Speaker tenangzükba agiogo.

Tawa Madhya Pradesh assembly election nung BJP-i menden 163 nung takok anguba ajanga Congress sorkar atsüngdoka liasü.

Chhattisgarh assembly election nunga BJP-i menden 54 nung takok ngua Congress sorkar atsüngdok. Congress-i menden 35 dang ngua liasü.



December 13, 2023 nü Bhopal nung Ato kilonser Narendra Modi aser Madhya Pradesh Angh, Mangubhai Patel nati Chief Minister tasenba, Mohan Yadav (ajichilen nungi mezüngbuba) den tangokba noksa nung angur. Amongnü Mohan-i CM tenangzükba agi.

### Gaza nung rara anema renemba bangzüng pusema India-i vote agütsü

**New Delhi, December 13 (Agencies):** Israel-i Gaza maneni amakba atema alima nung linüktem teimbakati Israel aitsüba meteta UN General Assembly (UNGA) nung Gaza nung rara anentsü atema renemba bangzüng ka pusema India-ia vote agütsüogo.

Iba bangzüng pusema linük 153-i vote agütsü.

Iba bangzüng pusema vote agütsüba dak sendakba nung India-i, iba rara nung lenla aika lir, iba nungji October 7 nü kiralongrartemi amakba, meimchirtem timtemba aser linük ana tsüngda yimjung koktetsü atema liromedema lenmang bushitsü nüngdak, ta metetdaksü.

October 7 nü Hamas teloki Israel amakba sülen India-ia iba tatalokba aitsüba den külemi International özüng akümtsübutüsü aser linük ana tsüngda ken o bentetsü ayongzükba den külemi Arab lima den tongtepratepa inyaka arudar.

Taruba Honibarnü Oman Sultan, Haitham bin Tarik-i India semdangtsü. Israel-Gaza tsüngda rara tenzükba sülenbo tang mezüng Gulf nung aliba linük ka nungi tongti leniri India semdangtsü.

Mongolbarnü UNGA nung iba bangzüng atema vote agütsüba mapang linük 23-i shilem magi aser US den Israel densema linük 10-i dang iba bangzüng anema vote agütsü.

Kasa bangzüngji ajanga pua alirtem ajak tangsa chioktsü takhangba agüja lir.

Mongolbarnübo Canada aser Australia ama US den tesendaktep aliba linüktemia

UNGA bangzüngji pusema vote agütsüogo. Taküm October ita nung Gaza atema renemba bangzüng atema vote agütsütep dangbo India-i shilem magii liasü. October ita nung renemba bangzüngji pusema linük 120-i vote agütsü aser linük 45-i shilem magii liasü.

UNGA bangzüng pusema vote agütsüba dak sendakba nung India nung permanent representative, Ruchira Kambhoj-i, "Iba tenteti lenla aika nungi o lemtepa arudar. October 7 nü kiralongrartemi Israel amak aser iba mapang nungji nisungtem puer aoba atema tebilemtsü akar. Meimchirtem kanga timtemdar aser civilian aika taküm samadar, talisa tetsür-tanurtem takoksa angur. Item ajak nungji international humanitarian özüng dak sendakba densema lir. Linük ana tsüngda teti atema ken o latettsü aser yimjung atema inyaktsü anüngdaka lir," ta metetdaksü.

Mongolbarnü iba bangzüng atema vote agütsüba jelia Israel ambassador to UN, Gilad Erdan-i, phone number den Hamas tongti lenir Yehva Sinwar noksa sayu. October 7 nü Israel amaktsü atema asalentong yanglur tongtiji Sinwar lir.

Erdan-i, "Nenoki chichiba ceasefire aginüra Gaza nung Hamas office tem dangi call süang aser Yahya Sinwar asüngdangang. Hamas dang raraba hadir tokjang aser pua alirtem chiokang ta shiang. Ibaji ajanga dang rara anentsü aser teti yimjung alitsü," ta metetdakja liasü.



December 13, 2023 anepdang Jammu nung tebur telok ka mi wangtepdang tangokba noksa nung angur. Jammu & Kashmir nung temperature kanga aluogo. Srinagar nungbo temperature 4.6°C tashi alu.

### Opposition INDIA-i Home Minister Amit Shah dang telangzüba meshir

**New Delhi, December 13 (Agencies):** Brihostibarnep Opposition INDIA teloktep nung aliba party tem nungi lenirtem senden ka mena Bodhbarnü Lok Sabha nung security raksaba atema o lemtepa sülen sorkar anema nokdaksü.

Lok Sabha nung security raksaba atema Union home minister, Amit Shah-i telangzüba agütsüba, ta opposition MP temi akhanger.

Parliament building tasenba nung security tsütsü metokmeperi lir, ta opposition-i aitsür. Rajya Sabha nunga

Opposition züngsem aikati Lok Sabha nung security raksaba atema Amit Shah-i telangzüba agütsüba, ta akhanger.

Opposition party tem tenüng nung Congress MP, Jairam Ramesh-i X ajanga, "Tanü nikongdang Lok Sabha nung tatalokba, talisa küm 22 tejaklen Pariament amakba kasa anogo nungsa iba ya atalok, ajisüaka Home Minister-i iba dak sendakba sangdong agütsüba memelungba atema INDIA party temi Rajya Sabha senden nungi ayazüka ao," ta metetdaksü.



## TIR YIMYIM YIMOBILEM (EDITORIAL)

DIMAPUR YANGTEPNÜ, DECEMBER (LUCII) 14, 2023

### Arla 370 aser 371 (A)

**K**asa linük aser kasa India sensosangersa süaka pei state nung yimsüsütsü asoshi temzüng balaka lateta yur yimsüsüa aruba Jammu & Kashmir state-ji linük temzüng arla 370 agi agütsüba tashi aser temeten amshia yimsüsüa aruba state ka liasü. Iba linük temzüng arla 370 amshia Jammu & Kashmir yimten lenirtemi 1949 küm nungi 2019 küm tashi yimsüsüa arur, tangbo iba arla linük temzüng nungi agienba den külemi Kashmir nunger asoshia India temzüngji dang külem temzüng kümogo. Ashi, linük arla 370 nung agüja aliba temeten aser tashi amshia pei state temzüng balaka laleta yur yimsü asüdangbo Finance, Defence, Foreign Affairs aser Communication dak alaka state aser nübortem atema inyaksüba tanga nungdak maparen ajak Kashmir nungertemi parnok dak apet aser parnoki mulungba nung temzüng ozüng lateta yimsüsüa liasü. Iba tashiji kodang bilemdangdir, India temzüng arla 370 dang nungibo arla 371(A) dakang tashi tuluba liasüba amai angateter. Atangji, Nagaland nung alir Naga nungertem asoshibo linük temzüng nung arla ka enoka toktsüba dak alaka Naga nunger asoshi temzüng balaka lateta amshia maru. Ibaji asenok tamakok ka asütsüa akok, kechiyong arla 371 (A) nungjiibo o rangben dang agüja lir, anungji itemji mapa kuma inyaksü asoshibo asenoki asenoksasa asen sobaliba, tamangba yimsü aser likalilem dak aketba inakyimtem Naga nunger arok atema temzüng ozüng kuma lateta amshitetsüla. Aji oda, kodang asenoki arla 370 o arla 371(A) na medemdangdir, arla 370 ajanga Kashmir nungertem nem tangar bendanger kintem den balaka tesendaktep ayutsü tashi agüja mangur, kechiyong arla 370 kübok Foreign Affairs maitdaksü. Ajisuaka, Nagaland atema latetba arla 371(A) nungbo Nagaland ya External Affairs kübok alitsü ta mezüngyongi lateta liasü. Iba jagi Nagaland ya India telongjem küboksa süaka Naga nunger aser Nagaland state ya India nung tanga state-tem dang nungi kenyongi balaka ta angatetdaksür. Ajisuaka, talirtemi litettsü aser talirtemiang lireptsü ta alinungji, asenok Nagaland nung alir Naga nungertembo Kashmir nungertem dang nungi jenjang tajemba kuma asenoki asenoksasa lirep nungji, tangbo arla 371(A) bo lir saka arla 371(A) nung 'Home' agi 'External' olongji melener angutsü. Kodang ibaji bilemdangdir, asenoki mangatet dang ashi, linük temzüng nungi arla 370 dang nungi tama arla 371(A) agienadokba amai asenoki angatettsü. Joko, arla 370 bo linük temzüng nungi meshimeshia agienogo aser Jammu & Kashmir agi ana kümstür India telongjem kübok tanga state aser Union Territory-tem den kasasa kümstüogo. Center government asoshibo ashi shitak, iba jagiang Supreme court-ia government mapaji metentsüogo. Joko, arla 371(A) dak kongshitsüba dang anünga lir. Atangji, arla 370 aser arla 371(A) ama arlatem ya India nunger tangar state nung alir sensotem asoshi meinprongtsüka liasü aser meinprongtsüka lir, kechiyong kasa linük aser kasa senso saka Kashmir aser Nagaland ama nung tangartemi ali alitsü makok aser Nagaland nung balaka temelaba meliibo tarua marutettsü. Aji oda, asenokibo tangar li alia teinyaknutsü inyakteter aser tangar state-temi aotsü atema temelaba menüngdaker saka tangarbo asen lima nung ali alitsü makoker aser temelaba melii marutetter ta asübaji tangar aikati magizüktetter, anungji arla 370 bo agienogo. Tang asen kidanger Manipur nung atalokba lendong yaa iba ama mesükba onük aser timtem nungi tenzükba lir. Atangji, Nagaland state akümdangbo tang Nagaland state kübok aliba Naga kintem asoshi dang masü saka alushi tangtepa aliba Naga nunger kintembo ajak külemi Nagaland state kübok alitsü taginüba aser teimla nung aküm, saka tanü tashi Naga kintem aika Nagaland küboki maittet lir. Ibaji maitjung dang, ashiko, asenok tang amai asen temeten dangbo sen-ang taoba ta bilema lira, arla 370 sülen arla 371(A) oadoktsü aser idangjiibo sen yur asen temeten mamshitettsü.

## OLEMSABANG

### 2023 küm Christmas benjong koma amungtsü renemdar...???

~ L. Kika Pongener.

Jokorla küm tembanga arur, Christmas mongpo tonga arur, anungji tulur-tilar, takar-sensaker aser kibongtem ajunga Christmas amungtsü sentong renemba mapang lir. Chirnurtema tesem balala nung, kar mapa inyaker, kar School & College azünger aser tenzükba mapa balala nung alirtem ajak, pei tsürabur den arua Christmas amungtsü yongaseta ataba mapang lir. Aluyimertema alu mapa ajak temer Christmas amungtsü yongaseta ataba mapang. Alima nung kin shia pei pei tongtipang benjong-bentsü lir, saka Christmas benjong yabo alima kin ajaki kanga sapua aser metsüngareta amunger, oda limapur aser mamangertem-ia kanga sapua amungba benjong ka lir.

Yisu Khrista alimai aruba ya Tsüngremi mimchir nem angadi agütsüba senpet ka lir. Asenoki tajung inyakbayong, mesura asenok dak alangba agi agütsüba, mesura asenoki aazükba senpet ka masü, saka Tsüngremi asen mimchir jenjang kecha mekai odang meimba agi angadi agütsüba senpet. Aser iba senpet yabo takar-tulur, sentsü-keter, tashi akar, kangasa tongtipang nisung (VVIPs) nem dang masü, saka nisung shinga tebandang mekai, oda tepetzük tia nung alir, sensakpo jenjang nung alir ajak nem bentsüba senpet ka lir. "Aser Tenyar jagi parnok (Sannuker) dang ashi...Metsübui liang, kechiaser...Ajiang ni nenok dangi 'Nisung ajak asoshi' tepela tulu osangtajung bener arur" (Luke-2:10). Nisung kar asoshi dang balaka (Special) bentsüba senpet ka masü, saka nisung ajak asoshi osangtajung bentsür aru.

Asenok mimchir-ibo Christmas senpet...Cake, Shijep etc. agütsüba ya...Teshimtet nisung kar nem dang agütsür...Tatishitsü agi, asen den anasatiba kinunger sosem/adianu, tembar, asen den meimtepa/jungtepa alir aser kanga tongtipang nisung (VIPs) kar nem dang agütsür. Aji oda, taküm 2023 küm aseni Shijep, Cake etc. shir nemsä agütsüdir...Parnok-ia sangkümü asen nema meyipa agütsütsü...ta meyipa angutsü teimla nung agütsür. Ajisuaka, Tsüngremi asen mimchir nem pei ajaso chir Yisu Khrista senpet agütsüba yabo, aseni tajung inyakbayong masü, aseni aazükba masü, asenok nungi tanaben meyipa angutsü teimla nung agütsüba-a masü, mesura nisung kar atema dang balaka (Special) agütsüba-a masü...Saka nisung ajak, kin ajak, tulur-tilar, takar-sensaker ajak asoshi bentsüba angadi senpet lir.

Alima nung senpet tapu aika dang lir, item senpet-tem rongnung kangasa tongtipang senpet-tem kar asenoki reprangdangdi...(i) **Award**: Iba senpet ya shirnoki alima nung ajakibo meinyaktetba mapa nungo/nungshi mapa tulu kar inyakteter...Tatishitsü agi kin o kin tsüngda yimjung apula (Peace Maker) mapa inyaker, mesura nubur atema tamamatsü (Memorable) mapa tulu kar inyakteter...Iba amala nisung nemji iba 'Award' ya agütsür. (ii) **Reward** :- Iba senpet ya shirnoki nisung kar taküm samatsüba jenjang nung lia taküm kümzüker, mesura aikatibo meinyaktetba mapa tasak kar inyakteter...Iba amala nisung nem 'Reward' ya agütsür. (iii) **Prize** :- Iba senpet ya shirnoki kaket shisatsü luyim/shisaliok nung tangar dang nungi tajungtiba jenjang (Merits) tongteter, aser sai-sapong (Games & Sports) nung jenjang tajung tongteter...Parnok nemji 'Prize & Medal' senpet agütsür. (iv) **Present** :- Iba senpet ya sadiba (Wedding) aser tasoba anogo (Birthday)...Yamala nung agütsütepba senpet ka lir...Iba senpet yabo tanü aseni agütsür, ano tarutsü nung tangar-ia asen nem meyipa agütsüba senpet ka lir. (v) **Gift** :- Iba senpet yabo 'Angadi senpet' ka lir. Aseni aazükba senpet masü, aseni mapa tajung inyakbayong agütsüba-a masü, tangari meinyaktetba mapa kar inyaktetba agi agütsüba senpet ka masü, mesura tanaben meyipa angutsü teimla nung agütsüba senpet ka masü...Saka jenjang kecha mekai odang angadi agütsüba senpet ka lir. Tsüngremi mimchir nem pa ajaso chir Yisu Khrista agütsüba ya iba senpet ya asütsü.

Atangji, asenok mimchir-ibo shirnoki asen nem senpet tuluba/tajungba agütsür, parnok nemji dang asen-ia meyipa tuluba/tajungba agütsür. Shirnoki taküm Christmas nung asen nem 'Shijep & Cake' agütsür...Par nem taruba 2024 kümü asen-ia 'Shijep & Cake' meyipa agütsütsü. Aji oda, iba senpet agütsütepba yabo temeim agi agütsüba senpet masü, saka sentsü sayutepba, tashi sayutepba, mesura tayang küpükba senpet...ta ajatsü akok. Aji oda, Tsüngremi asen mimchir nem pei ajaso chir 'Senpet' agütsüba yabo, tanak-temesung, tulur-tilar, takar-sensaker, lajar, mata-mabensar shinga tebandang mali, jenjang kecha mekai odang agütsüba senpet lir. Anungji Tsüngremi asenok nem angadi agütsüba amaji...Jenjang kecha mekai, shinga tebandang meli-i, ajak den iba temeim senpet ya lemsateptsü angazükdi. Asenoki asen nem agütsür nem dang agütsüra, asenok tajangzükji parnok nungi meyipa angutsü. Ajisuaka, asenoki kodanga asen nem meyipa magütsütettsüba nisung...Sensaker, tilar, lajar, leni maor, mata-mebensar...Iba ama nisung nemji agütsüdi. "Ne chiyungtsü tzüma nung prokang; kechiaser anogo aika lir aji angutsü" (Sayu-11:1). Asen chiyungtsü tzüyim nung enoktsü nungbo tenuk masepshi nung ponger oa-adoktsü...Tetezü...kodanga meyipa mangutsü...Iba amala asen nem kodanga meyipa magütsütettsüba nisungtem nem asen chiyungtsüji agüjang...ta Tsüngrem o jagi ashir.

Temeim arogopur tajungtem, taküma Christmas tonga arur, kibong shia Christmas atema sentong tapu balala renema alitsü sudi. Ni iba ocet ajanga tazünger ajak ayongzükubaji...Christmas benjong ya alima tazü-tapongtsü, tenukshitsü, tenuk-jaloba aser shi jangraba benjong ka mekümdaktsüli. Kima-yimdong aser kilung sen merijang/lakh aika endoka tobur junga renemtsü-jia (Decoration) kanga tajung ako...Ajisuaka, iba dang nungibo, pei temang shi nung mokokmein agi sunger, sensakpo jenjang nung timtema tobur mejungi alirtem kar danga, asen akaba tajungtiba lemsatepba agi tobur jungdaktsüra...Iba-jiang 'Christmas Decoration' tajungtiba aser 'Christmas Gift' tulutibaji asütsü. Anungji 2023 Christmas yabo alima tazü-tapongtsü, tenuk jalotsü, shi jangraba aser chidiyungdiba benjong ka mekümdaktsüli...Saka sensaker, tilar, lajar, leni maor, mata-mabensar aser mokokmeiner kar nem-ang jang bosta ka, shi kg. ka alitsü sen tera-ka, mesura suoshi kar agütsüdi...Ibaji-ang Christmas Decoration tajungtiba aser Christmas senpet tulutiba asütsü. Tsüngremi mimchir nem bentsüba 'Angadi Senpet'-ji...aji asütsü. Arung 2023 Christmas benjong yabo iba yimya nungji amongtsü renemdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir**

## Gaza yimti nung Holy Family Arogo Tenla ki raksatsüogo



Yaküm December 24 aonung Gaza yimti nung aliba Holy Family Arogo Tenla kidang Khristmas tekülem sentong agidang tangokba noksa nung angur.

**December 13, 2023:** Gaza Strip nung Roman Catholic Arogo Tenla ki ka dang aliba ibajia taoba hopta Israel sepaitemi anünglen nungi amakdang raksatsüogo.

Tang Israel aser Hamas na tsüngda rara ajanga Palestine nung Khristantem kanga koda-masüba tensa ka nung lir.

Israel sepaitemi anünglen nungi amakdang Gaza yimti nung Holy Family Arogo Tenla ki aser temeket nung aliba Arogo kiojentem raksatsüogo, ta Latin Patriarchate of Jerusalem-i Aid to the Church in Need (ACN) nem metetdaksü.

ACN local partner kati, "Onok dak lendong tulu ataloktsü liasü, ajisüaka sayatenya ajanga dang nokdangtetogo," ta metetdaksü.

October 7 nü Hamas teloki Israel amakba sülen nungi tenzüka tang tashi nung Israel nung sepaitemi densema civilian 1,200 dak tema süogo. Ano Israel-i Gaza amakdang tang tashi nung nisung 18,000 dak tema süogo aser nisung 50,000 dak tema yirüogo.

Khristantem densema nisung noklang aika Holy Family Arogo Tenla kidangji jenoka liasü. Iba Tenla kidang chiyungtsü densema teyari balala agüja liasü.

Iba Arogo nung pastor, Gabriel Romanelli, Israel-i Gaza nungertem dang southern Gaza leni aienshitsu tetuyuba agüja liasü, ajisüaka yangi Arogo züngsem aikati pei kidang nungi mainshitsu telemteba agi, ta metetdaksü.

Pastor-i, "Parnoki pei talidak nungi aienshitsu memelung, kechiyong parnoki Yisu dak amanger aser Tsüngrem parnok den den-a lir ta amanger," ta metetdaksü.

Paisa, Gaza nung Khristantem kanga aoksaogo aser jashir, ajisüaka Tsüngremi parnok kümzüksü ta parnoki amanger, ta metetdaksü.

Khristan charity telok ACN-

i ashiba agi, iba rara tenzüka sülen iba tesem nung Khristan 22 süogo; Khristan 17 bo Gaza nung Tenla ki tejentiba Greek Orthodox Church of Saint Porphyrios amakdang asü.

Israel-i Gaza anema apusoba sülen Holy Family Arogo aser Greek Orthodox Arogo (Church of Saint Porphyrios) Tenla kitem nung Khristantem aika jenoka liasü.

Taoba ita nunga Holy Family Church Tenla kidang tanur 100 dak tema densema nisung 750 shi jenoka liasü.

Taoba ita Israel-i anünglen nungi amakdang Khristan school- Rosary Sisters School raksatsü. Iba school ya Holy Family Church den sendaktepa lir aser iba school nung Muslim nung tanurtem densema school tanur 1,250 tezüngdak liasü. Iba dak alia Gaza yimti nung Khristan kibong 53 indang ki raksatsüogo.

Rosary Sisters School nung principal, Sister Nabila Saleh-i, onoki iba school azüngtetsür liasü, ibayongji amakdang shinga masü, ta metetdaksü.

Evangelical American-Israel nung kaketzülor nüngtugu, Joel C. Rosenberg-i Gaza nung Palestine nung Khristantem den tongtepratepdar. Pai Israel lenirtem aser alima nung lenirtem dang, Gaza nung Palestine nung Khristantem kanga timtemdar, anungji parnok yaritsüla, ta mepishio.

December 7 nü Rosenberg-i, "Gaza nung Palestine nung Khristantem atema tensa tamajungba dang akümer. Iba rara tenzüka sülen Khristan 1,000 jungnüa Gaza yimti nung aliba Tenla ki ana nung jenoka lir aser kar nija kidang jenoka lir," ta metetdakja liasü.

Tamalen Rosenberg-i shidi ka ajanga Isreal nung sepaitem dang northern Gaza nung Palestine nung Khristan 1,000 shi kümzüka West Bank-i aienshidaktsütsü mepishia liasü.

Palestine

nunger


Khristantemji southern Gaza leni ora Hamas teloki parnok tepsettsüa akok, ta bilema Rosenberg-i Israel sepaitem dang Khristantem kümzüksü mepishi.

Pai shidi ajanga, "Northern Gaza nung Palestine nung Khristantem lendong nung lir, aser ghonda shia tensa tamajungba dang akümer. Palestine nung Khristantem Hamas kiralongrartem pu-masemer, Islamic kiralongra pu-masemer aser Israel amakba pu-masemer, ajisüaka parnok kodamasüba tensa ka nung lir, kechiyong Gaza nung parnok tejenokdak mali," ta metetdakja liasü.

Rosenberg-isa Israel sorkar dang Gaza nung aliba Khristantemji West Bank-i odaktsütsüla ta mepishi, kechiyong West Bank nung alir Palestine nung Khristantem parnok pelaa agizüktsü.

Rosenberg-isa, "Alima tesem ajaklen Evangelical Khristantem dang item Khristantem nem teyari agütsütsü atema Khristan melungtet teloktem den inyaksü mepishir aser Israel nung lenirtem dang tauchi sayua Gaza nung Palestine nung Khristantem kümzüksü mepishir," ta metetdaksü.

## 'The Chosen' Khristmas special 'Holy Night' theaters nung sayaogo



**December 13, 2023:** Nüngtugu series "The Chosen"-i Christmas special tasembuba, "Christmas with The Chosen: Holy Night" sayaogo.

Khristmas special ya December 17 tashi sayutsü.

Khristmas special 'Holy Night' nungji Andrea & Matteo Bocelli,

## ANOGO ABEN TSÜNGREM DEN

### Sempettem tamashi masü

Luke 12: 13-21

Saka Tsüngremi pa dang ashi, Na tamashi ... Tsüngrem tsüngdang takar masü Pa iba nisung mesüker (Luke 12:20-21).

Iba o entepba nung taochitsü nisungji iba takar nisung ka ya lir. Pa amaji mashi nisung ka asütsü akok. Iba otsü nung Yisui ashiba nisungji aluyimer ka liasü. Takümüji junga ali aser Pai tsük rizüngtsü asoshi jen tali aser tajungba yanglu. Saka iba dang nungi pa tajungba oset rizüngtsüba liasü.

Asenoki alima nung kechi angur ibaji shidak alimaji ta bilema rizungba tekümdangtsü asenok nem iba otsü ajanga Yisui asenok nem agütsür. Asenoki kechi angur aser kongshitetter aji asenoki rizungner aser züngshir. Asenoki sempettem dak rangloker aser tagütsürji amadoker. Yisui tagütsür indangji bilemdaktsüner aser Pa den tesendaktep shidak lidaktsüner. Tagütsür Tsüngrem indang mapa tuluji Pai agütsübaji indang indanga temulungjangi air. Pai agütsüba tulutijba sempet Pa jabaso Kümtetdakba lir. Tsüngremi Pa den tesendaktep shidakji dang lidaktsüner masü saka Yisu Khrista ajanga ibaji takoktsü kümdaktsü.

Yisui asenok Pa dangi aja aser asenoki shidakba taküm rongsenji: tauchi, tesünep aser teti taküm Pa nungi angur. Osangtajung nung amangba tamang ajanga asenok tanelaren takar akümer aser Tsüngrem den tesendaktep lidaktsür.

Tsüngrem, tajung ajak agütsüsang, ajak dang taoba onok nem amangba tekolok aser tenüng asangba temulungjang agüjang.

## Nisung 4,000 dak temai 'Christmas tree festival' nung aden

**December 13, 2023:** England kübok Bicester jila nung nisung 4,000 dak temai akhidang asüba Tenla ki ka semdanga anogo asemnü 'Christmas tree festival' nung aden.

Bicester nung aliba St. Edburg Tenla kidang Khristmas süngdong 70 den Tenla ki sübotsü reprangtsü atema nisung meyirjang aikati iba Tenla ki semdang. Iba festival ya December 8-10 anogotem nung agia liasü.

Rev. Peter Wright-i, "Anogo asemnü festival nung nisung 4000 dak temai Tenla ki semdangogo. Ibaji yaküm den medemdanra nisung shilem 26 dak temai semdangba liasü," ta metetdaksü.

"Khristmas süngdong tepor ajungba reprangba den külemi Khristantem sarasadema liasü. Iba sentong takok angutsüsa mapang agütsüteta inyaker volunteers ajak dang Arogoi pelar," ta paisa metetdaksü.

Dallas Jenkins-ia Arogo dak sendakba project ka nung shilem agia lir.

"Tesüiba küm trok tejaklen ni Illinois nung ozü medemer ka farm nung film tatsüka tangoka liasü. 'The Shepherd' film ji Yisu Khrista asoba aser sannükertem, iba denji külemi ozü Arogo Khristmas Eve sentong dak sendakba liasü. Tatemsabo iba film ajanga 'The Chosen' ya tenzüka," ta taoba ita Jenkins-i metetdakja liasü.

"The Chosen" fourth season sangküm February 1 nungi theaters nung tenzüksü, iba sülen Chosen app densema platforms aika nunga sayatsü.

Matt Maher, Zach Williams, Bonner Family, Brandon Lake aser One Voice Children's Choir-ia shilem agia lir.

Imdangjem 'drama' ya Yisu Khrista aser Pa nütsüngtem otsü nung ajemdaker yanglu.

Khristmas special nungsa The Chosen series yangusang

**AO OSHI ANGAZÜKDAK:  
TANÜ ANGAZÜKTSÜBA OJANG**



**Sentsüketer**

(n) Takar aser tular nisung ( powerful person)

\* Lokti nung sentsüketertertem dang amshir.

**Sentsüprang**

(adj) prangshia aliba sentsü (shining)

Sentsüprang oset ajak hon dangbo masü.

**OLONG PAITEP # 6643**

1		2			3		4		5
				6		7			
8									
						9			
			10						
11									12
					13		14		
15									
16							17		

**TIPIEN**

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü- (4)

**LANGTSÜNGLEN**

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6642 TELANGZÜBA**

**TIPIEN :**

- 1. Tesangra, 5. Mungo,
- 7. Kisen, 8. Salem,
- 12. Semki, 14. Kilem,
- 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**NAI - A YA METETER MA**



December 13, 2023 nü Srinagar nung agiba noksa ka angur.

Taküm asükwa mongpu tenzüker Srinagar nung temekongtiba anogji Bodbarnü liasü. Tanü Srinagar nung minimum temperature ji minus 5.3 degrees Celsius asadantet. Maneni Gulmarg nung minus 5.5, Pahalgam nung minus 5.3, Leh town nung minus 12.2, Kargil nung 9.6 aser Drass nung minus 10.9 ta tanü minimum temperature liasü ta Meteorological (MeT) Department-i metetdaksü.

**APSC nung taoba principal controller of exam apu**



**Guwahati, December 13, 2023 (Agencies):** Assam Public Service Commission (APSC) ken o dak sendakba nung taoba principal controller of exam police ket nung lir.

APSC nung taoba principal controller Nanda Babu Singh ya Assam police indang special investigation team (SIT)-i apu.

Nanda Babu Singh dak alia okadakisa Karbi Anglong district nung superintendent of taxes Wahida Begum anogo 14

nü police ket nung ayutsü temelaba agütsüogo.

APSC nung sen yong mapa yokdokba ken o dak sendakba nung Assam sorkari ketdangsür 21 tashi mapa nungi anentsüogo.

Mapa nungi anentsürtemji 11 Assam Police Service (APS) officers 11, Assam Civil Service (ASC) officers 4, excise inspector 1, ARCS officer 1 aser assistant employment officers 3 lir.

“2014 küm APSC nung sen

yong mapa yokdokba ken o dak sendakba bushisüngdangba SIT-i ita pezü tsünga charge-sheet agütsütsü” ta Assam director general of police (DGP) GP Singh-i ashi.

“Police-i taruba ita asem pezü tsünga charge sheet agütsütsü anungji SIT-i iba ken o indang osang tejanga bushir” ta DGP GP Singh-i ashi.

“Onoki aibelenba kuli tejanga angur shinga metoktsütsü. Tang tashi nung nisung 72 puogo” ta paisa ashi.

**Assam sorkari madrasa 1,281 regular schools melener**

**Guwahati, December 13, 2023 (TYO):** Assam nung Department of School Education-i December 13 nü ME (Madrasa Education) madrasas 1,281 tashi ME Schools agi melenba osang metetdaksüogo.

SEBA (Board of Secondary Education Assam)-i sorkar aser provincialised madrasas ajak regular schools agi melener.

Iba osang ya Education Minister Ranaj Pegu-i social media nung metetdaksü aser

pai school tenüngtem shiogo.

Assam Chief Minister Himanta Biswa Sarma-i taküm küm tetenzüklen state nung madrasas (Islamic religious schools) ajak shibangtsü tebilemba aliba shia liasü.

**Guwahati nung nisung 2 ket nungi ganja aika apu**

**Guwahati, December 13, 2023 (Agencies):** Assam Police nung Special Task Force (STF) kati Guwahati nung ganja aika puogo.

STF-i osang ka angazükba nung ajemdaker Champak Nagar tesem nung arishi küm

22 tain tetsür ka ki mita ao.

Idangji tetsürla den la den yariteper ka apu. Iba nisung ya Barpeta district nungi Nitu Pathak (29) ta jangjaogo.

Tena ket nung plastic packets 17 nung ganja seret 11.28 aser

Stash-pro papers packet 4 ngutetogo. Police-isa mobile phones 6 apu.

Osang angazükba agi Pathak ya Datalpara nung telidak liasü. Tenaprongla police ket nung yua lir.

**PAJSC-i APPSC züngsem tasentem aniokba aitsür**

**Itanagar, December 13, 2023 (Agencies):** Pema Khandu-i aniba sorkari Arunachal Pradesh Public Service Commission (APPSC) Chairman aser Members tasentem tezüngzüktep agidaksüba aitsür ta Pan Arunachal Joint Steering Committee (PAJSC)-i ashi.

October 2022 nung APPSC taoba ketdangsürtemi mapa nungi anenba sülen ita 14 jungnüa arur züngsem tasentem tezüngzüktep agidaksüogo.

APPSC paper tim mesüi prokshiba ken o atema PAJSC-i mapa inyaka arur.

Pema Khandu'er sorkari iba mapa inyakba ta tanur kisen asayar ama aser mapa bushirtemi taitüsü keta bilemer ta parnoki ashi.

APPSC nung Chairman tasen Prof. Pradip Lingfa (NERIST) aser züngsem Prof. Ashan Riddi (RGU) na tezüngzüktep agiba sentong nung medentet kechiyong tenati office of profit nungi anenba maparen ano metembang lir.

“State sorkari ano parnok sasa aibelenba inyakogo aser

Arunachal Pradesh Public Service Commission tenük menütsür” ta PAJSC vice chairman Tadak Nalo-i ashi.

PAJSC-i iba inyakyim magizüker aser aitsür. Nübortemi tim masüba agi APPSC züngsemtem shimba aitsütsü ayongzükter, ta Nalo-i ashi.

Arunachal Pradesh Governor K T Parnaik-i Arunachal Pradesh Public Service Commission (APPSC) nung chairman inyaksü atema Professor Pradip Lingfa den

Professor Ashan Riddi, Col (Retd) Koj Tari aser Rosy Taba nunger züngsem asütsü shim.

Lingfa ya Department of Mechanical Engineering, North Eastern Regional Institute of Science & Technology (NERIST) nung professor aser Riddi ya Rajiv Gandhi University (RGU) nungi lir.

Maneni Tari ya retired colonel ka aser Taba ya National Commission for the Protection of Child Rights (NCPCR) nung züngsem ka ama inyaka liasü.

Office of the  
**MOLUNGKIMONG CULTURAL CLUB**

P.O. Tuli, Dist. Mokochung  
Nagaland - 798 618

**PELABA LEMSATEPER**

Naga Heritage Village, Kisama nung 24 buba Hornbill Festival 2023 benjongmung December 1-10, 2023 anogotem amungba mapang Ao kin tenüng nung Cultural Club, Molungkimong oa shilem agidang kija, kibong aser lokti kwikati rongsen, nübu, shisatsü aser sarasadem agi yaritepogo, nenok ajak dang Cultural Club, Molungkimong ajanga pelaba lemsateper. Nenok mapa tajung asoshi Tsüngremi maneni moajang.

<p>Sd/- <b>(N. Aowati Tzudir)</b> Convenor Cultural Club Molungkimong</p>	<p>Sd/- <b>(Temen Jamir)</b> Secretary Cultural Club Molungkimong</p>
---	---

**SITUATION VACANT**  
**CHRISTIAN SCHOOL TULI, MOKOKCHUNG, NAGALAND - 798618**

Sl.No	Name of Post	Minimum Qualification	Salary
1.	Headmaster	BA, B.Sc, B.Com (with B.Ed)	18,725/-
2.	Graduate Teacher	BA, (Hons)	13,325/-
3.	Scripture Teacher	B.th	13,325/-

Interested Candidate may apply with complete bio-data by 19th of Jan'2024 to the School authority.

Sd/-  
Head Master In-charge  
Christian School, Tuli Mokokchung, Nagaland  
M# 7005151911  
Email: christianschooltuli@gmail.com

Sd/-  
Chairman  
Christian School, Tuli, Mokokchung, Nagaland  
M# 8974822507

## Gaza nung Israel sepai ter tepset

**Jerusalem, Luchii/December 13 (Agencies):** Yashi Gaza north tsütsü raradang sepai ter asü, ta Israel mitkari ashi, anungji Hamas anema alilen nungi rara tenzüker mitkartem timtiba anogo akumer.

Asürtem rongnung battalion commander ka aser colonel ka densema nisung toku Gaza City anüdoklen Shejaiya nung raradang asü.

Hamas teloki meita atar amakba nung parnok ya asü ta osang ajanga ashir.

Tang tashinung Israel nunger sepai 115 takum samaogo.

Taoba mapang military chief of staff aser Israeli War Cabinet züngsem Benny Gantz-i X (Twitter) nung iba rara ajanga takoksa tulu aser taa tamajung angur, ta shia liasü.

Ajisüaka Israel nunger timbai iba rara ya nüngdak aser

shidak ta maneni bilemer. Tayimtsü amshia amakba ajemtsü US-i tali ajungshiba yong alilen nungi raraba nung lendong tali ajuru asü, ta Israel nunger aikati social media nung asüngdang.

Tayimtsü amshia bomb pokloktsuba ya Israel sepaitem asoshi tajungba, saka Palestine nunger civilian aika südaksür.

Gaza nung nüburtem aben-süoshi teperi maka aser jenokdak ki peria mali timtemba mapang Mongulbar aonung tzünglu kanga sashia arua nüburtem tali ang tim atemer.

Tzünglu den mopung temokong aonba ajanga nüburtemi asük-asa tali meteter. Ajisüaka taruba hopta tashi tzüngsang majungtsü amai tzüngsang-mopung takzür temi ashir.

Gaza nung küm shia tzünglu ya November aser February ita

tsüngta arur, anungji aruya aliba hopta aser ita maneni mokongtsü.

Israel-i tesüiba ghonda 24 tsüngta 250 ben Gaza tesem balala makogo ta ashir. Aser tang tesüsa tayimtsü amshia amakdang nisung 50 takum samaogo ta Hamas ketdangsur temi ashir.

Rara agi raksar aliba Gaza nung humanitarian ceasefire alitsü atema pangzüng ka bhukuma züngsem 193 aliba United Nations General Assembly (UNGA) nung vote agüja liasü.

Mongulbarnü agizükba pangzüng ya bhukuma linük 153-i vote agütsü, linük 23-i vote magütsü aser linük 10-i pangzüng anema vote agütsü aser yangji Israel aser United States densema lir. Iba pangzüng ya talenba ka maka aser alimai bilemba sayur ka amai lir.

## Poland PM mapa abentsü atema Donald Tusk tenangzüktepba agiogo

**Warsaw, Luchii/December 13 (Agencies):** Poland tir-i achayanga Bodhbarnü pro-EU Ato kilonser Donald Tusk tenangzüktepba agiogo aser iba ajanga küm ti tashi right-wing puri yimsüsüa aruba tembangdaksüogo.

Administration tasenba atema minister tem ya state indang conservative tekolakbai achayanga takok ngua tenangzüktepba agiogo, shiba Law and Justice (PiS) party-i aniba taoba sorkar den sendaktepa lir.

Tusk shiba taoba mapang 2007 nungi 2014 tashi Ato Kilonser liasü, pai European Union nung Poland jenjang

yanglushitsü tenangzükba agütsüogo. Poland-i temzüng ozüng sülen shidak manidakba ajanga EU den tesendaktep raksar lir.

Taoba European Council tir yagisa, rara agi kanga mejungi kongshir aliba Ukraine nem teyari agütsütsü asoshi par sorkari kanga tongtibangsa inyaksü, ta ashi.

Tusk indang cabinet nung foreign minister ama Radoslaw Sikorski densema lir, shiba taoba mapanga iba mapa benogo. Pa den ano justice minister mapa abentsü atema taoba ombudsman Adam Bodnar shimogo.

October ita general

election nung PiS-i menden timba akok, ajisüaka parnok den longjemer sorkar kümtettsüpur manidentet aser Hombarnü parnok indang minority sorkar nungia teyari mangu.

Sorkar tasenba ya anogoshia PiS MP temi timtem agütsütsü akok. Par party ya tir, central bank aser supreme court aser iba den ano judicial aser financial state institution tongtibangtem den kanga junga sendaktepa lir.

Poland tir Andrzej Duda shiba 2025 küm mapa nungi anentsü lir, pai tenokdangba balala agüja sorkar nem tetsükdaksü agütsütsü akok.

## Russia-i Kyiv nung missile khaloktsü, aika yiru

**Kyiv, Luchii/December 13 (Agencies):** Russia-i Bodhbarnep Kyiv nung missile khaloktsüba mapang nisung 53 yiru, tanur indang mozüki ka aser nisung aliba ki kar raksa.

Ukraine yimtiba nung tenük yoker khaloktsüba missiles aika air defence system ajanga anepdang 3:00 ako meta khazüka yokdang ola tulu adoka apokdang nüburtem aoksar sak.

Dnipro ayong sür anüdoklen missiles khazüka yokba teraksa tsükdang nisung 45 shi yiru, ta Kyiv Mayor Vitali Klitschko-i ashi.

Tila-tanur trok densema nisung 18 mozü kidangi anir ao aser tanungba nisungtem ya yirua alidak anepalu.

Apartment building ka, nija ki ka aser gari kar nung mi kaolok aser Kyiv kübok Dniprovskiy District nung tanurtem indang mozüki ka kijiba aser kishi raksa, ta Klitschko-i ashi. Rocket teraksa tsükba agi tzu agütsüba system raksa.

Russia nunger ballistic missiles ter khazüka yok ta ketdangsur temi ashir.

Ukraine Tir Volodymyr Zelenskyy United States-i aoba sülen iba lendong ya atalok.

Congress nung pai Ukraine asoshi mitkar tsütsü teyari tali meshiba Republican temi memolunger.

EU lenirtemia Ukraine nem teyari tali agütsütsü asoshi Brehostibarnü jembishinütsü

aser Ukraine tashi aitsü asoshi asenoki agütsütsü nüngdaker, ta European Commission Tir Ursula von der Leyen-i ashi.

Bodhbarnep amakba atema Zelenskyy-i telangzüba agütsütsü nangzükogo. "Russia-i ano maneni parnok ya linük tamajung ka ta kuli sayua aonung micciles khalokja nisung aliba tesemtem, kindergartens, aser energy facilities amak," ta pai X nung post asü.

Bodhbarnep amakba yagi Ukraine yimtiba nung ballistic missile amshia tan hopta tanaben amaker alitsü. Tawa Kyiv nung Russian drones amshia makaka anogo 79 tashi missile amshia amakba nungibo jenbua aru.

(Maneni tapak 8 nung...)

## MENUNGRA BILEMTETER

Teti dang menungra bilemteta aliba ozü tsürapur late. Nangshimenla akümüli tembanger Dec' 14th (2021-2023) tanü tsürapur taküm ali den sako temoatsü ka kuma bilemteter.

Chirnur, Semchir aser Kinungertem.



## CLOSING CEREMONY



Date: 16th Dec. 2023 || Time: 10:00. Am.

Venue : **Langpangkong Tsükong**  
GHS Chuchuyimlang, Play Ground

*Special Guest*

**Shri. N. Jamonger Ao**  
Assistant Director  
Food & Civil Supplies  
Mokokchung: Nagaland.

## ARRIVAL OF SPECIAL GUEST DISPLAY

Compere : **Mr. Sungjemtemsu & Ms. Moasenla**

1. Invocation : **Rev. Temjenlemzung**, Pastor  
CBC Chuchuyimlang Town
2. Special No. : **Ms. Imlisen**
3. Speech by the Special Guest :
4. Vote of Thanks : **S. T. Nokdang Lkr.**  
Member MFT Organizing Committee

## CHAMPIONSHIP MATCH

### Prize Distribution

#### CO-SPONSOR

- ❖ Runner Up Sponsor by Arenlong Jamir, PA to Minister Rural Development
- ❖ Semi finalist Loser Sponsor by G Sports, Mkg & Er. Imtiwati Jamir Kohima
- ❖ Best Player Sponsor by Lt. Imsumar Family
- ❖ Best Goal Keeper Sponsor by Gilgal
- ❖ Best Defender Sponsor by Talitemjen & Family
- ❖ Highest Goal Scorer Sponsor by I. Sunep Dimapur
- ❖ Best Team Sponsor by Medemer Telongjem Telok

## Chuba tilutsüba atema Thai MP ka tepuokdaki yok

**Bangkok, Luchii/December 13 (Agencies):** Thai nunger MP kati social media nung linük chuba tilutsüba atema küm trok tepuokdak ayutsü atema obendang agütsüogo.

Move Forward Party (MFP) MP Rukchanok Srinork-i social media nung la tebilemba lemsatepba, obendangertemi chuba tilutsüba ta agizükba sülen tepuokdak ayutsü obendang agütsüogo, ta la okatsür aser lar party nungi züngsemtemi metetdaksü.

"Rakchanok Srinork ya 112 (lese-majeste) charge nung küm asem aser Computer Crimes Act charge nung küm asem tepuokdak ayutsü obendang agütsüogo," ta MFP leader Chaithawat Tulathon-i AFP news agency dang ashi.

Srinork-i bail atema apply süogo aser security ama 300,000 baht (\$8,500) agütsüogo.

Arishi küm 29 tain Bangkok nungi MP ya okadak ajanga bail

magütsüra disqualify asütsü, ta la okatsür aser külem MP Weeranan Huadsri nati Reuters news agency dang ashiba den iba obendang agütsüba atema lai temepeshiba ka agütsütsü.

Rukchanok ya 2020 küm Chuba Maha Vajiralongkorn meyong company ka aser COVID-19 vaccine yangluba dak sendakba nung post tem tanaben tweet asüba atema aitsüogo, koba lai magizük.

Thailand indang lese-majeste law ya alima nung ozüng tesastiba ka lir. Iba ozüng yagi chuba, chubatsür, parnok nungi jakzükertem tangari aitsüba nungi kümzüka ayur aser iba ozüng nung aibelenertem aibelenba shia küm 15 tepuokdak ayutsü obendang agütsür.

Critics temi ashiba agi, chuba anema nokdakertem ajem ajema kümdaktsütsü atema iba ozüng ya yangluba lir. (Maneni tapak 8 nung...)

## Mkg. nung Li Ning North East Invitational Badminton Tournament 2023 tananübuba asaya osang



Mokokchung nung Li Ning North East Invitational Badminton Tournament 2023 tananübuba anogo Mokokchung Deputy Commissioner Thsuvisie Phoji (abelen) aser pa partner asayaba mapang nung tangokba noksa angur.

**Mokokchung, December/ Luchii 13 (TYO):** Mokokchung nung Li Ning North East Invitational Badminton Tournament 2023 tananübuba anogo Indoor Badminton Stadium Mokokchung nung kanga dang takokma nung asayaogo.

Tanu Round 16 asaya 3 aser Quarter Final asaya 18 ta asaya liasü aser item nung takokertem telemsa yamai liasü.

Round 16 nung telemsa balala nung takokertemji Bendangnochet + Er. Philip,

Imosanen + Martemjen, Er. Toshikaba + Lipok Jamir aser parnok ya Quarter Final asayatsü.

Maneni ano Quarter Final asaya 18 nung telemsa balala nung takokertemji yamai liasü aser parnok Semi Final asayatsü maongka ajangzüktetogo. Bendangnochet + Er. Philip, Imiakum + Aochuba I. Pongener, Er. Toshikaba + Sendongyanger, Imosanen + Manoj Kumar, B. Kumar Barman + Y. Singh, S. Bendang Imchen + Martemjen, I. Temjen

+ Sashiwapang, Temsuyanger Lemtur + Natu, Teichang Herie + Peramrisi Zeliang, Wapangmeren A. Jamir + Sewang Konyak, Unil Kumar + Hitto V. Swu, A.S. Khangampam + Heikrajum Pushiba Singh, B. Kumar Barman + Y. Singh, Bendangnochet + Er. Philip. Imosanen + Martemjen, Temsuyanger Lemtur + Sashiwapang, Chumlammo + Imtisunep, Spongtemsu Longchar + Tiayanger.

## Paes aser Amritraj na Tennis Hall of Fame atema shimogo

**Luchii/December 13, 2023 (Agencies):** Leander Paes shibai tebur tarep asaya aser tarep temeyoktep asaya nung Gland Slam 18 kokogo pa aser promoter Vijay Amritraj na Asia nungi teburtem rongnung mezüngbuba International Tennis Hall of Fame nung züngoksemtü atema shimogo

Hall ya Newport, Rhode Island nung amenoka lir aser 1955 nungi inyaksangshia arudar. Class of 2024 ya Bodhbarnü sangdonga liasü. Ano taruba küm British journalist aser historian Richard Evans-a Contributor Category nung shimogo.

Amritraj-a Contributor Category nung shimogo aser Paes Player Category nung shimogo aser tena ya India nung rongnung International Tennis Hall of Fame nung züngoksemer mezüngpur lir.

China tsür Li Na shibai Grand Slam kija asaya ana kokogo, la ya 2019 küm Asia tsürtem rongnung International Tennis Hall of Fame nung züngoksemtü mezüngbuba asayar aküm.

Taruba küm iba sentong ya Newport nung July 20 nü agitsü. Küm ana tashi Player Category atema asayar ka danga nominate masüba sülen tang Paes shimogog.

Leander Paes-i tebur tarep asaya nung tongtibang asayamung ti aser tarep temeyoktep asaya nung tongtibang asayamung 10 kokogo aser pa ya asaya tapu anaprongla nung Grand Slam nung takok tajung anguba asayar asem rongnung ka lir. Pa aser taoba mapang pa indang tarep temeyokyep asaya partner Martina Navratilova nati Grand Slam nung tarep temeyoktep asaya timba akokba record yanglur lir.

Paes-i men's tour nung tebur tarep asaya nung asayamung 55 kokogo aser pa ATP doubles rankings nung No. 1 jenjang nung hopta 37 tashi liasü.

Maneni pai India tenüng nungi Davis Cup tarep asaya 45 koker aliba ya otsü tasen ka lir aser pa Summer Olympics tenet tashi nung shilem agiogo, koba tennis asayartem rongnungi

Olympics nung timbaben asayaba asütsü. Pai 1996 Atlanta Games nung tebur kija asaya nung bronze medal ka ngua liasü.

Kasa mapang nung Amritraj ya 1970s aser 1980s nung professional asayar ka liasü aser 1974 aser 1987 küm India team Davis Cup Finals tonga asayaba mapang pai tongtibang shilem agiogo. 1974 küm apartheid anema India team-i tatembangbuba round nung South Africa den masayai liasü. Asaya nungi anenba sülen pa tennis broadcaster aser administrator ka aküm aser iba den teyari maparen balala nung shilem agia liasü.

Maneni Evans-i 1960 nungi tennis indang osang agüja aruogo aser pai Grand Slam asayamung 200 dak tema aser tanga asayamungtem indang osang agütsüogo. Ano pai kaket 20 dak tema züluogo. Pa ya International Tennis Writers' Association tentetertem rongnung ka aser pa 2001 nungi 2004 tashi iba lokti tentet tir liasü.

Phek district Jubilee Marathon Advisor Nyusietho-i tenzüksü **Dimapur, Luchii/December 13 (TYO):** New & Renewable Energy and NSDMA (National Disaster Management Authority), Government of Nagaland, Advisor Z Nyusietho Nyuthe-i December 13 nü Meluri Sub Division nung Phek district küm 50 ajungba nungdem nung ayongzükbba Jubilee Marathon tenzükbba liasü.

Km 7 asema marathon ya Department of Youth Resource & Sports, Government of Nagaland-i sponsore asü, koba Anapo stream nungi tenzükbba aser Meluri Local Ground nung tembanga liasü.

Teburtem asemtepa ya Lepenthe Yanphar-i akok aser tanabuba aser tasembuba jenjang nung Yanphar aser Ahuchu Thupitor na liasü. Tebur

category nung consolation sempet Yutsolen Yanphar, M Vitsiitho, Maj. Sudhir Sharma, Miilongthvii Jangri, aser Kuoziitho Ngouri nung nem agüja liasü.

Tetsür category nung asemtepa Ayinla Nyusou-i akok aser Zuchivi Nyusou o Asingla Thuer na tanabuba aser tasembuba jenjang nung liasü. Maneni consolation sempet Rholozhe, Rhewiesa, Gracy Joshou, Ziivi Kajiry, aser Ngarho Joshou nung nem agütsüogo.

Iba Jubilee marathon asemtepa nung tebur 35 aser tetsür 11-i kanga jangrabangra shilem agiogo. ADC Meluri, Albert Ezung-i asemtepa nung takok angurtem nem sempet agüja liasü.

## Swiatek nem WTA Player of the Year naroküm agütsüogo



**Luchii/December 13, 2023 (Agencies):** Tetsür tennis asayartem rongnung temaba jenjang nung alila Iga Swiatek nem WTA-i taküm agi küm anabuba atonga WTA 'Player of the Year' naroküm agütsüogo.

Swiatek-i taküm kanga junga asayaogo aser lai French Open tasembububa koka ajak senteper Grand Slam pezübuba koka liasü. Lai taküm mezüngbuba WTA Finals koka season temaba jenjang nung tembangogo.

Arishi küm 22 tain Poland tsürta, shibai tour mapang title trok bena liasü, ya Serena Williams (2012-2015) sülen season ana atonga WTA Player of the Year naroküm

anguba mezüngbuba asayar kümogo.

Kasa mapang nung 'Doubles Team of the Year' naroküm Storm Hunter aser Elise Mertens na nem agütsü aser China tsür Zheng Qinwen nem 'Most Improved Player' naroküm agütsü aser Russia tsür Mirra Andreeva nem 'Newcomer of the Year' naroküm agüja liasü.

Elina Svitolina shiba mapang tatsüka masayai lir April ita nungi asaya tenzüka liasü, la nem 'Comeback Player of the Year' naroküm agütsüogo. Svitolina-i taküm Roland Garros quarter-finals tonga asaya aser Wimbledon nunga semi-finals tonga asayaogo.

## Russia-i Kyiv nung... (Tapak 7 nungi...)

Anogo 79 lir Russia-i taoba hopta nungi ano cruise missiles amshir, ta ketdangsur temi ashir.

Russia-i Iskander-M ballistic missiles aser S-400s khaloktsü ta Ukraine indang Armed Forces General Staff ajanga ashir, koba air defence asoshi lir aser kangasa teker missile lir.

Rongnendak Odesa yimti nunga drones amshia aonung tepiyong amak, ta regional military chief kati ashi. Iba mapang nisung ana yiru aser civilian indang ki o jen raksatsü. Ukraine tir ya par linük

defences asoshi teyari meshia jembishinütsü asoshi Bodhbarnü Norway tongogo.

Pa US nun goa Congress dang mitkar asoshi teyari meshiba sülen meyipa shilang. Ajisiüka Washington nungi teyari angutsü teimla kangabo maka kumogo.

Kasa mapang US Tir Joe Biden-ia Republican tem dang Ukraine nem mitkar tsütsü teyari magütsüra Russia nem "Khrismus sempet" ka agütsür ama asütsü ta tekumdangtsü shiogo.

## Chuba tilutsüba atema Thai MP ka... (Tapak 7 nungi...)

Computer Crimes Act ya-a rights groups temi aija arudar, kechiyong iba ajanga nüburttem pei tebilemba lemsateptsü atema nokdaksü asoshi ketdangsurtem nem tashi tali agütsür.

2020 küm lanurtemi anir yimtung nung pro-democracy longkak aitba sentong ayongzüka agiba sülen iba ozüing ya kanga amshia arudar.

Palace aser the lese-majeste law melehsitsü atema ayongzüka democracy movement ka anir sorkar anema nokdakba sülen Rukchanok ya kanga nungtugu aküm.

Iba sülen la progressive MFP nung aden aser parnoki royal insults law melenshitsü atema sentong ayongzüka liasü. La ya May ita general election

nung shima MP kümogo.

MFP-i menden timba akok, ajisiüka sorkar mekümtet, kechiyong royalist military shimba mesüra parnok den sendaka aliba MP temi kanga ajang ajanga nokdaka liasü.

2020 küm nungi tang tashi nung chuba tilutsüba atema nisung 262 aitsüogo, ta advocacy group Thai Lawyers for Human Rights-i ashi.

## BILEMDANGANG

"Tangari na sentoka metoktsütettsüa tajung dang inyakang."